

ՁԱԳԱՋՈՐԻ ՏԵՂԱԴՐՈՒԹՅՈՒՆԸ

ԱՐՄԵՆ ՂԱՐԱԳՅՈՋՅԱՆ

X դ. Տաթևի վանքին հարկատու գյուղերի հին ցուցակում (Սյունյաց աշխարհի Հաբանդ գավառում) հիշատակվել է Ձագաձոր անունով գյուղ¹։ Բնակավայրը ունեցել է բերդ, որի մասին Ստեփանոս Օրբելյանը գրել է. «Հաբանդայ բերդ, որ ի նոյն տոհմէ Սիսակայ ի Ձագայ Նահապետէ շինեալ ի վերայ գետոյ միոյ կոչէ յիւր անուն զձորն Ձագեձոր և զբերդն՝ Ձագեձորոյ բերդ...»²։ XIII դ. կեսին Ձագաձորի բերդը եղել է Սյունիքում մոնղոլական զորահրամանատարի նստավայրը, «Քանզի ընդ այն ժամանակս էր զօրագլուխ նետողացն, որպէս թագաւոր ի վերայ ամենեցուն Բաշու՝ Նոյինն. և նստէր ի գաւառին Հաբանդայ՝ ի գլուխ Ձագեձորոյ...»³։ Ձագաձոր անունը հետագայում տարածվել է ամբողջ գավառի վրա։ XVII դ. սկզբին վկայվել է Ձագաձորու երկիրը (գավառը), որը փոխարինել է Հաբանդ գավառանվանը⁴։ Ձագաձորը գտնվել է Գորիս գետի հովտում⁵, սակայն նրա աշխարհագրական դիրքն անհայտ է։ Ձագաձորի տեղադրությանն անդրադարձողները հայտնել են տարբեր կարծիքներ։ Ըստ Ղ. Ալիշանի Ձագաձորի բերդը եղել է հին Գորիսի (Վերին շեն) շրջանում⁶։ «Ջանգեղուր անունն, ըստ Հայր Ալիշանի, ծագել է Ձագեձոր անվան աղավաղումից, իսկ սա՝ Ձագ Նահապետի անունից։ Հավանական համարելով առաջին ենթադրությունը՝ կարծում ենք, որ Ձագեձոր խոսքն էլ առաջացել է ոչ թե Ձագ Նահապետի, այլ «ծակերի ձոր» անունից, որովհետև հենց այժմ էլ, Գորիսից փոքր ինչ բարձր գտնվող ձորը, ուր եղել է ամենահին բնակությունը, կոչվում է «ծակերի-ձոր» այդտեղ գտնվող բազմաթիվ «ծակեր»-արհեստական- քարայրի պատճառով»⁷, — գրում է Ե. Լալայանը։ Ս. Բարխուդարյանի ենթադրությամբ Ձագաձոր գյուղը գտնվել է Մակերի ձոր վայրում, իսկ բերդը՝ Գորիսից հարավ, Լաստ լեռան գագաթին⁸։ Թ. Հակոբյանը հավանական է համարել Ղ. Ալիշանի ենթադրությունը⁹։ Ս. Լիսիցյանը անդրադարձել է այդ տեղանուններին, սակայն չի ճշտել դրանց տեղադրությունը¹⁰։ Մ. Հով-

¹ «Պատմութիւն Նահանգին Սիսական, արարեալ Ստեփաննոսի Օրբէլեան արքեպիսկոպոսի Սիւնեաց» (այսուհետեւ՝ ՍՍԽԳՈՒՍ ՕՐԲԷՂԵԱՆ), Թիֆլիս, 1910, էջ 517։

² Նույն տեղում, էջ 13։

³ Նույն տեղում, էջ 405—406։

⁴ «Հայերեն ձեռագրերի Ժէ դարի հիշատակարաններ (1621—1640)», հ. Բ, Երևան, 1978, էջ 188։ Ժամանակի ընթացքում այդ անունը աղավաղվել և դարձել է Ջանգեղուր (Ղ. Ալիշան, Սիսական, Վենետիկ, 1893, էջ 261)։ XVII—XVIII դդ. Տաթևի թեմի ապոստոլի ցուցակում վկայվել են «Ջանկեղուր» գավառի 12 գյուղ («Ժամանակագրութիւն Ստեփաննոսի Օրպէլեանի», Երևան, 1942, էջ 42)։

⁵ Այն դեպք, որի ափին, ըստ Ստեփանոս Օրբելյանի վերոհիշյալ վկայության, գտնվել է բերդը, կոչվել է Վարարակ (ՍՍԽԳՈՒՍ ՕՐԲԷՂԵԱՆ, էջ 253)։ Այս անունով հայտնի է այն հորդաբուխ աղբյուրը, որից սկիզբ է առնում Գորիս գետը [Ե. Լալայան, Ջանգեղուր («Ազգագրական հանդես», 1898, № 2, էջ 22)]։

⁶ Ղ. Ալիշան, նշվ. աշխ., էջ 261։

⁷ Ե. Լալայան, նշվ. հոդվ., էջ 7։

⁸ «Դիվան հայ վիճագրության», պրակ 2, Երևան, 1960, էջ 78։

⁹ Թ. Խ. Հակոբյան, Սյունիքի թագավորությունը, Երևան, 1966, էջ 158։

¹⁰ Ս. Լիսիցյան, Ջանգեղուրի հայերը, Երևան, 1969, էջ 19։

հաննեսյանը հայտնել է հետևյալ կարծիքը. «Օրբելյանի «ի վերայ գետոյ միոյ» բացատրությունը՝ մեզի ենթադրել կու տա թե ակնարկությունը Կորես գետի մասին է, որ Ձաղեծորի մեջեն կանցնի»¹¹: Ն. Պապուխյանը Ձաղաձորը համարել է Գորիսը (Կորես)¹²:

Գորիսի և Ձաղաձորի նույնացումը ճիշտ լինել չի կարող, որովհետև դրանք տարբեր բնակավայրեր են և վկայվել են միասին Տաթևի վանքին հարկատու գյուղերի հին ցուցակում¹³: Անհավանական է նաև Ձաղաձորի և Ծակերի ձոր տեղանունների նույնացումը: Այստեղ առկա է միայն երկու տարբեր անվանումների զուտ հնչյունական արտաքին նմանություն: Ծակերի ձորը հավանաբար Գորաջի հետ վկայված Աղոջրիկ¹⁴ գյուղն է, որն իր անունը կարող էր ստանալ Շոռ ջուր վտակը կազմող սելտերյան աղբյուրներից, որոնց մասին ժամանակին հիշատակել է Ն. Լալայանը¹⁵: Ձաղաձորի տեղագրության հարցում որոշակի պարզություն է մտցնում Տաթևի վանքին հարկատու գյուղերի հին ցուցակի քննությունը: Այդ ցուցակում Ձաղաձորը և մի քանի այլ բնակավայրեր հիշատակվել են հետևյալ հաջորդականությամբ. «...Ականայ, Ձաղաձոր, Պետրոսկայ վանք, Նախանձփոր, Աղոջրիկ, Գորաջ...»¹⁶: Թվարկված գյուղերից հայտնի է միայն Աղոջրիկի և Գորաջի աշխարհագրական դիրքը: Ակնհայտ է նաև Ականա գյուղի տեղագրությունը. այն, անկասկած, գտնվել է Վարարակ աղբյուրի մոտ, որից և ստացել է իր անունը: Տվյալ դեպքում Ականան «Գյավուրի բներ» գյուղատեղին է, որովհետև ավելի մոտ է տեղադրված Վարարակին, քան գետի վերին հոսանքի շրջանում գտնվող մյուս բնակատեղիները: Այս գյուղի տեղորոշմամբ որոշակիորեն հայտնի է դառնում այն շրջանը, որտեղ գտնվել է Ձաղաձորը: Դա համընկնում է ներկայիս Բոռն գյուղի տարածքին և նրա շրջակայքին: Այդ շրջանում են գտնվում Ձալեր, Ալի դարա, հին Բոռն, Կյուփեր, բնակատեղիները: Բացառությամբ հին Բոռն¹⁷ գյուղի (կառուցվել է գետափին գտնվող մի հրվանդանի վրա), մյուս գյուղատեղիները տեղադրված են հարթավայրում, և տեղանքը աննպաստ է բերդ հիմնելու համար: Հետևաբար, ամենայն հավանականությամբ Ձաղաձորը եղել է հին Բոռն գյուղի տեղում: Օ. Խնկիկյանի հայտնաբերած նյութերը (1980 թ.) որոնք թվագրվում են մ. թ. ա. II—I դդ.¹⁸, նույնպես վկայում են Բոռն գյուղի տարածքում ավելի վաղ շրջանում բնակավայր լինելու մասին:

Տաթևի վանքին հարկատու գյուղերի հին ցուցակում նշված վերոհիշյալ գյուղերի հաջորդականությունը համեմատելով Ձաղաձորի հովտում գտնվող բնակատեղիների տեղաբաշխման հետ, կարելի է տեղորոշել նաև Պետրոսկայ վանքը և Նախանձփորը (Նախանձոր)¹⁹, Դրանք գտնվել են Ձաղաձոր և Աղոջրիկ գյուղերի միջև: Այդ տեղամասում են Վերիշեն գյուղը (Պղնձաքար լեռների

11 Մ. Հովհաննեսյան, Հայաստանի բերդերը, Վենետիկ, 1970, էջ 335:

12 Ն. Մ. Պապուխյան, Սյունիքի ժողովրդական ճարտարապետությունը, Երևան, 1972, էջ 36:

13 Ստեփանեսի Օրբելյան, էջ 517:

14 Նույն տեղում: Տեղանունը հիշատակվել է նաև Աղնոյ ջրիկ ձևով (տե՛ս «Ստեփանեսի Սինեաց եպիսկոպոսի Պատմութիւն տանն Սիսական», Մոսկվա, 1861, էջ 375): «Աղնոյ (սեռ. Աղի բառին) + ջրիկ այս է՝ ջուր + իկ մասնիկ» (Հ. Հյուբշման, Հին հայոց տեղանունները, Վիեննա, 1907, էջ 299):


15 Ն. Լալայան, նշվ. հոդվ., էջ 24:

16 Ստեփանեսի Օրբելյան, էջ 517:

17 Գյուղը հիմնադրվել է 1880 թ. («Հայկական սովետական հանրագիտարան», հ. 2, Երևան, 1976, էջ 541):

18 Օ. Խնկիկյան, Նորահայտ հուշարձան Գորիսում («Պատմա-բանասիրական հանդես» այսուհետև՝ ՊԲՀ), 1981, № 4, էջ 312—313):

19 «Ստեփանեսի Սինեաց եպիսկոպոսի Պատմութիւն տանն Սիսական», էջ 375:



լանջին) և Սինդարա բնակատեղին²⁰: XIX դ. վերջին այստեղ եղել է նաև մի ավերակ վանք²¹: Այս ամենից ելնելով, կարելի է եզրակացնել, որ այդ եկեղեցական շինությունը եղել է Պետրոսկա վանքը, իսկ Սինդարա բնակատեղին՝ Նախանձփոր գյուղը: Նմանապես կարելի է պարզել մեկ այլ բնակավայրի՝ Ուկաձագի (Ուկաձակ)²² տեղադրությունը, որը հիշատակվել է Գորայք գյուղից հետո: Այն կարող է լինել միայն Օփավեր²³ վայրում գտնվող բնակատեղին, որը ունեցել է նաև բերդ²⁴:

МЕСТОПОЛОЖЕНИЕ ДЗАГАДЗОРА

АРМЕН КАРАГЕЗЯН

Р е з ю м е

В старом списке податных деревень Татевского монастыря (X в.) в гаваре Абанд Сюникской провинции упоминается село Дзагадзор. Это поселение имело крепость, о которой сообщает историк Степанос Орбе-лян. В середине XIII в. крепость Дзагадзор являлась резиденцией мон-гольского военачальника в Сюнике и, вероятно, административным центром гавара. В дальнейшем это название распространилось на всю округу. В начале XVII в. упоминается страна Дзагадзор, название, которое заменило название Абанд.

На основе сравнения рукописных данных с материалами, полученными при изучении местности, установлено местоположение Дзагадзора, который находился на месте старого села Брун Горисского района. Установлены также местоположения поселений Акан, Петроскаванк, Нахандзапор, Аходжрик, Ускацак, которые упоминаются вместе с Дзагадзором.

²⁰ Այստեղ կա մի քարաշեն, կամարակապ եկեղեցու ավերակ և բավականաչափ թրատակա-ներ, մի քանիսը քերծերի, մյուսները հողի մեջ փորված (Ե. Լալայան, նշվ. հոդվ., էջ 30):

²¹ Շնոր Գորիսից դեպի հյուսիս, հաղիվ մի վերստ հեռավորությամբ միևնույն հովտում գտնվում է մի քարաշեն, գեղեցիկ վանքի ավերակ, քանդված պարսպով ու մի քանի խցերով: Մի քիչ ներքև վազելիս է եղել մի սառնորակ աղբյուր, որ այժմ Գ. Միրումյանի ծախսով տարված է Նոր Գորիս: Ոչ մի արձանագրություն չկա բոլոր ավերակների վրա, միայն ավանդու-թյունը պատմում է, թե սա երբեմնի շատ հարուստ վանք է եղել, ունեցել է բազմաթիվ հոտեր, որոնց տված կաթը խողովակներով հոսել է սարից մինչև վանքը: Այստեղ է եղել և այն չորավոր (զոռ) զանգը, որն իր անունը տվել է գավառին (Ե. Լալայան, նշվ. հոդվ., էջ 28): Այժմ այդ վանքը գոյություն չունի:

²² Վտեփանոսի Սինեաց եպիսկոպոսի Պատմութիւն Սիսական, էջ 375: Տեղան-վան ճիշտ ձևը եղել է Ուկաձակ, սակայն «ձ» և «ծ» տառերի շփոթման հետևանքով դարձել Ուկաձագ: Բաղկացած է Ուսակա և «ձակ» բառերից: Ուսակա բառը ստուգաբանվում է չուս, բլուր, բարձունք [Գ. Մ. Գրիգորյան, Պատմական Սյունիքի մի շարք գյուղերի տեղադրության հարցի շուրջ (ՊՐՀ, 1966, № 4, էջ 134, ծան. 5)], իսկ «ձակ»՝ «ձակ, ծերպ, այր» (Հ. Հյուբշման, նշվ. աշխ., էջ 279): Հետևաբար, տեղանունը արտահայտել է տարբեր ունեցող բարձունք իմաստը:

²³ Հավանաբար՝ Ափավեր (ափից վեր գտնվող). հմմտ. Օ ծ ո փ > Ա ծ ո փ (տե՛ս Ա. Այվազյան, Նախիջևանի պատմաճարտարապետական հուշարձանները, Երևան, 1978, էջ 71) և այլն: Այդ անունով է կոչվում վարարակ գետի (Գորիս-Քարահունջ տանող ճանապարհին) աջ ափը իջնող շենաճուղը, որի գետնահայաց մասի այրերը ծառայել են իբրև կացարան:

²⁴ Ե. Լալայանը բերդատեղին հիշատակել է Վժիշարա անունով (նշվ. հոդվ., էջ 28):